



DEO OPTIMO MAX.

UNI ET TRINO,

VIRGINI DEIPARÆ, ET S. LUCE

Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS

manè discutienda, in Scholis Medicorum, die Lunæ,

decimo-tertio Aprilis Anni M. DCC. XXXIII.

M. EMMANUELE-MAURITIO DU VERNEY,

Doctore Medico, Præside.

An Panis jurulentus ad spissitudinem glutinosam percoctus insalubris?

I.



UM peraguntur liberè corporis functiones, tunc sanum esse judicatur. Dulcissimum bonum fanitas. Ejus pretium carendo meliùs quàm fruendo sentitur, jactura doloribus solet variis aggravari : infelicem prorsùs eum dicas qui amisit, nisi Religionè fultus animi vigorem è corporis debilitate eruat. Prudentiæ est sanitatem, quantum licet, tueri. At fortasse tenuior videbitur nostra quæstio, nec satis digna quæ Medici attentionem postulet. Parva, inquier, negligere satiùs, nec eum decet ad minuta descendere, cujus ars tam latè patens circa grandia potiùs, & magis necessaria debet occupari. Hæc non facillè obijciat qui Medicinæ naturam per-

spexerit : nec parvum dicat quidquid lædere sanitatem potest. Non vilescit Medicus si de minimis rectè & appositè dixerit. Creator ipse cum syderum motus, æstus marium, universi orbis corpora regat & moderetur : tamen sine Summæ Majestatis offensione etiam capillos capitis nostri numerat. Dei minister, tantum exemplar, quàm licet, æmulans, nullam observationem respuat quæ cum utilitate conjuncta sit ; nec alta solum & nobilia investiget, ea quoque disquirat quæ vulgaria videntur. Idem scopus in utrisque, quid humano corpori bonum, quid contrarium, expendere. Quæstionem seligimus non operosam intricatamve, sed expeditam & facilitate allicientem suâ. Etsi talia non magni referre videantur, saltem probant quædam posse in singulis notari ; potè scientia Medici in observatione posita est. A parvis quandòque ad majora conscenditur. Ex pluribus comparatis exurgere potest utilis cognitio. Si quis vel inania modò ingeniosè tractet, laudi tribui solet ; cur vitio verteretur, quòd res ad incolumitatem pertinentes scrutemur accuratius ? Fatemur præsens argumentum & similia, licèt generalis usus, causariis præcipuè, aut è morbo rescici incipientibus, sanis verò minùs attendenda. Ut autem mala etiam gravia spernere viri fortis est : ita Medici sapientis etiam levia cognoscere, observare, præcavere, aliis, ut caveant, indicare. Præterea quæ levia per se & etiam ferè nulla sunt, si sæpius renoventur, si quotidie recidant, ingravescent & periculosa evadunt. Quid autem frequentius usu cibi de quo agitur. Medici officium est cautiones pro rei gravitate adhibere, si periculum urgeat, si insignis noxa timenda sit, sedulò & sine morâ præoccupet. Si levis est metus, si non nisi successu temporis imminet labis discrimen, prudenter advertat, & paulatim morbis obices ponat.

I I.

QUÆRES à quo pendeat functionum facilitas in quâ modò sanitatem statuimus. Nimirùm ab æquabili & ordinato liquorum circuitu, hic autem nisi posita sanguinis crassi conveniente stare non potest. Quidquid sanguinis indolem genuinam fovet & ipsius liquorumque ex eo manantium liberum ruetur per vasa itum reditumque, sanitati favere meritò credas. Contra, quod sanguini noxam inferre, quod chyli confectionem retardare & liberam distributionem impedire aptum est, plùs minùs sanitati nocet. His attendere prout rei natura postulat, Medici partes sunt. Placuit veteribus quæcumque corpori humano nocere vel prodesse idonea sunt, non-naturalia nuncupare. Inter cætera plurimùm posse alimentorum delectum nemo negaverit. Inde conficitur chylus sanguini reparando allaborans : dum enim circuit sanguis, & omnium universi corporis humorum materiam suppeditat, dum vasis ipsius & canalibus qui motu assiduo deteruntur refarciendis inservit, quotidiano nutrimento opus est, quod digestionis ope in substantiam corporis facessat. Novo in dies chilo appellente, novus quoque sanguis procreatur. Hujus gelatinosa pars, lymphæ nutritia, per extremitates arteriarum sive porosæ, sive in vascula lymphatica abeuntes, lateribus vasorum applicatur, & in vacuola interstitiaque inseritur, sic renovantur perpetuò solidorum stamina. E sanguine etiam fecerunt multiplices indolis liquida omnibus compertum est. Nempe per tubulorum ad incredibilem usque exilitatem glomeratorum replicatorumque gyros & an-

3
fractus diversè premitur, citius tardiusve impellitur, & particulas diversæ molis, figuræ variæ, pro incerniculorum quæ offendit, varietate, hic, illic deponit. Cibi necessitatem famis sensus indicat. Hic in sanis vividus est, & necessitati corporis accommodatur; in ægris inordinatus, quandòque ultra modum augetur, sæpius verò retunditur. Ejus loco deliquia, virium defectum prostrationemve non faciliè reparabilem plerumque significant. Tunc vitiatis, ut contingere solet, humoribus, ac speciatim liquore gastrico, alimentorum digestionì via præcluditur, quæ maximi momenti est.

I I I.

CIBUS nullus Pane usitator, nullus salubrior. Hunc appetere signum sanitatis est; fastidire morbi indicium. Cerealia, frumentum præsertim (ex eo conflatus Panis optimus) non ut animantium carnes redundant sulphuribus. Non leguminum ad instar crassiori substantiâ constant. Non oleum more aqueis turgent particulis. Friabilia sunt, levia, solvi, ac dividi habilia, faciliè in pollinem reducuntur. Hinc citius cremorem educas. Panis sit mollis, nec humidus, nec siccus, ex farinâ purâ, novâ & benè subactâ: hic in chylum converti aptissimus. Ad conficiendum Panem multas subit farina præparationes. Harum ope ad convenientem in ventriculo coctionem recipiendam disponitur. Primò molâ pistrinove tundi, teri, dividi farina debet; debet Panis ventriculi motu, non immenso illo & incredibili quem ipsi asfingere placuit, sed mediocri & placido, versari, agitari, attenuari. Aquâ postmodum affusâ farina diluitur; Panem succo salivali & gastrico imbui necesse est. Hunc succum si putes fermenti lenis, nec à statu sano abhorrentis vicem gerere (absit verbo invidia) nonne pastam priùs oportuit verè fermentari quàm clibano committatur. Demum moderato clibani calore coquitur, perficitur; ventriculi calorem digestionì non inutilem admodum verisimile. Ex diæis colligitur Panem inter eupepta alimenta recensendum.

I V.

APUD varias gentes præcipuè autem apud nos, in usu positum est Panem vel ex aquâ, sive cum carnibus, sive cum oleribus, adjuncto butyro, &c. vel ex lacte coquere. Scilicet ut calore resolutus digestionì aptior evadat. Illud edulii genus non ad delicias tantum modò comparatum; ad sanitatem etiam conferre, maximè in debilibus, fatemur. Nec ignis operam recusare in animo est: sed time ne ex amico hostis fiat. Ejus officio utere; necessarium est. Cave autem ne vehementius agat. Cave ne protrahatur longius periculosi officii usura. Quod moderatum profuisset, quod blandè initio affectit, cane pejus & angue, intensiori aut diuturniori nocebit actione. Curandum ut Panis integrantes partes convellantur paululùm, leviter ab invicem dimoveantur; ita ut laxius junctæ remaneant: Id obtinebis si Panis superficiem, trans patinæ poros, calor igneus paulatim & per gradus penetret, & intra ipsius compagem se se, ut par est, insinuet. Itaque coquentis manus offarum latera alternatim igni opportunè objiciat. Nunc subjacentia supravertat; mox superiora versus patinæ infima declinet. Panis substantiam plus æquo dissolvi non sinat; ne in puliculam spissiore aut potiùs in gluten viscumque degeneret. Ignem puta armamentarium quoddam mille jaculis telisque fortum. Si nimia coctione liberior detur aditus, quâ datâ portâ ruent & incendia pa-

rabunt. Mitto strages à salibus carniū evolutis, à butyri lactifve evecto sulphure procreandas. Panis solius habeatur ratio. Si partes aquosæ avolent, si affatim irruerint igneæ, pastæ speciem præ densitate tantum non exhibebit. Hæc in sanguinem pro mollibus tenuibusque particulis succos deferet indigestos; pro balsamicis & gelatinosis acria quædam & velut pungentia spicula concitandis sulphuribus & salibus idonea. Ventriculi motus non bene versat moleculas frangi renitentes ac firmius cohærentes. Difficile coquet partes rigidas, liquore orbatas. Fibræ ab adustis, ab igneis, si quæ superint, partibus irritabuntur. Cum enim pro summâ tenuitate & pernicitate Panis intima pervadant; non facile egredi, verum aliquas forsan in angulis meatibusque residuas delitescere non immerito suspicaberis. At etiam si vix ulla omnino post certum temporis spatium remanere contendas, certe inharere ardoris reliquias fatearis necesse est. Quem inde chylum expectes? nempe lentescemtem, ad phlogosim propensum, & intestinis infartus, molestias, tumultus illaturum. Mirari desine, si consequantur nauseæ, cardialgie, ructus, borborygmi, ventris tormina, flatus, paroxysmi febriles, multiplex animalis æconomix depravatio. Nec fallaci coquorum arti credideris. Hæc sæpe irritamenta gulæ proponens, celat sub arridentibus palato ferculis latentes insidias. Nam sæpe ubi consumpto jure Panem torrefecerunt, novum jus assumendo gluten diluere solent. Sic incipientem coctionem mentiuntur, nimia vitia noxasque dissimulantes. Sic exsiccata recoquendo fomites fomitibus adjiciunt. Quin etiam rufa jacula & aureum colorem referentia mensis offerre amant; nec solum ex carnibus talia eliciunt quæ fornaces liquidas merito nuncuparis, ea quoque è crustis adustis sive penitus exsiccatis exprimunt. Harum loculi, nota ignis receptacula, subtilissimis scintillis recipiendis, asservandisque apprimè pares.

V.

FRUSTRA objicies Panem bis coctum & induratum à navigantibus quibuscumque usurpari. Hunc morem ex necessitate & cibi melioris inopiâ inventum in exemplum trahi non posse manifestum est. A pari carnes fumo induratas & sale conditas ut diutius ferventur nemo salubriores affirmavit. Quod ad usum spectat, qui circa plurimos ægrotantes obtinet; Panem sensim sine sensu, jure identidem affuso, imbuiere, dividere, coquere licet; modò ignis lentior mitiorque sit; absit ut vituperemus coctionem moderatam in quâ temporis diuturnitas caloris mediocritate compensatur. Repones hanc vigere apud innumeros consuetudinem, eos maxime quibus novam quotidie pulcritudinem coquere per facultates non licet, ut hesternam aut à pluribus etiam diebus asservatam iterum atque iterum foco superponant. Quid inde eruas? Si prima coctio sufficiens, si perfecta fuerit, ferculum sequentibus vicibus ultra modum coquetur; sic minus salubre pro certo evadet. Adde non solum Panem, sed quæ cum eo concocta sunt fermentari, degenerare, acrescere, vitiari. Ergo *Pani s jurulentus ad spissitudinem glutinosum percoctus insalubris.*

Proponebat Parisiis JOANNES DE DIEST, Altena-
Germanus, Baccalaureus Medicus, A. R. S. H. 1733,
à sextâ ad meridiem.